

四庫全書

子部

欽定四庫全書

子部

事實類苑卷二十五至
七

詳校官編修臣周 瓊

員外郎臣 牛稔文覆勘

總校官中書臣朱 銖

校對官典簿臣劉景岳

謄錄監生臣鄧捷成

欽定四庫全書

事實類苑卷三十五

木 江少虞 撰

官職儀制

樞密使

唐以中官為樞密使與中尉謂之內貴梁為崇政殿院使後唐舊有帶相印者分東西二院晉廢國初復置中書為二府亦曰二院但行東院印耳其後除授不常以檢校官不帶餘使正官自趙普始使帶節鉞自曹彬始

使簽書院事自石熙載始以文資官充使亦自熙載始
知院自張士遜始以文臣知院兼使相自王欽若始簽
書兼藩鎮自曹瑋始今官制復古而樞密之職舊與三
省長官同通謂之執政官矣

三司使

唐末始分鹽鐵度支戶部專領財賦後唐明宗始號一
司總以二使國朝或曰判三司或曰權判或曰點檢三
司開寶中以參知政事二人提點三司既而更用宰相

為都提舉興國中分二使同判三司逾年復析為三使
淳化中又合為三司既而又以天下為十道二京為左
右計置二計使分判十道別命三司總計使判左右計
事所謂三司如故咸平末三司各置副使其官輕則曰
發遣迄元豐初不廢今悉歸尚書省矣

司理叅軍

五代以來諸州馬步軍院都虞候以牙校為之太祖慮
其任私高下其手乃置司寇叅軍以進士九經及第人

充之河東柳開先生初及第為宋州司寇叅軍後又改
曰司理叅軍至今俚俗猶以司理院為馬步院

選朝官知縣

建隆中擇才能之士出宰大邑大理正奚璵知大名府
館陶縣監察御史王祐知魏縣選朝官知縣自璵等始
太祖重縣令之任至矣

參知政事

國初趙普為朝相欲用薛居正呂餘慶同政而不欲令

與普齊難其名號詔問陶穀曰唐有參知政事知機務
下宰相一等故以命居正等參知政事然不押班不知
印按唐裴寂以僕射參知政事郭待舉以資政任闕於
中書門下同受承進止平章事然則平章大於參政穀
乃以為參政下宰相一等失之遠矣其後因之不改迨
官制更革始罷

進奏院

國初州郡各自置邸吏散在都下外州將吏不樂久居

京師又移符行下率多稽滯或漏泄密事太平興國中起居郎何保樞以為非便奏置鈐轄諸道都進奏院以革其弊人給以銅朱印一紐起居王沂公外祖而予妻之曾祖也

發運使

至道初朝廷始遣洛陽苑使楊允恭作闕副使李延遂太子中書舍人王子與為江淮兩漕發運使并置制茶鹽就江南劍南局後兼領荆湖南路旋又加都大字後

廢景德中復置迨今猶存

提點刑獄

景德中真宗御筆六事以示近輔三曰提點刑獄可於朝臣及武臣使副中選清幹者使提點一路刑獄按舉官吏賢否後又加權使迨今不廢而武臣廢置不常

糾察在京刑獄

祥符二年朝廷以京師獄訟之繁懼有冤滯始置糾察在京刑獄司以省冤濫命知制誥周起侍御史趙緡為

之凡在京師刑獄御史開封府皆得察之起慮屈抑者不能盡知許令糾察陳狀從之但非鞫獄耳

宣徽使

宣徽使位在樞密使之下副使之上咸平初周營為宣徽使有所避乞居其下亦從之遂以為例

以上並
水燕談

中書五房

中書有制勅院院內有五房第一曰孔目房次吏房戶房刑房禮房舊每房堂後第一人主生事第二人主熟

事第三人發勅向下逐房只置堂後堂一人闕行遣文書至道中逐房只置堂後堂一人却置主事錄事各一人仍別置提點五員一員迄今行之

察院一司四房

察院所管一司四房一司曰院禡司第一房曰兵房次吏房戶房禮房逐房有副承旨一人次有主事令史書令史貼房之人並行遣公事有都承旨副承旨諸房副承旨諸人並都管一院之事所置名目不定

三司子司

三司子司三部各有計院都磨勘司支收司拘取司開
拆司憑由司理欠司三計院各一人判之磨勘支收一
人判之開拆衙司一人判之憑由理欠一人判之

刑部主判詳覆法直官

刑部主判官或一員兩員不定詳覆官六員主詳覆天
下斷訖大辟奏案法直官一員以流內人任之年滿得
京官

審刑院

審刑本中書刑房宰臣所領之職淳化中析出置審刑院每大奏案須經審刑詳覆判院官同詳議官一人進呈得旨後批送中書降勅始以樞密直學士李昌齡知院使置詳議官六員以京朝官並賜緋

御史臺

御史自大夫至主簿並存六典舊式今只置中丞臺端各一員共判臺事外有推直言或以他官充左右巡使

各一御史充主簿一員與推直同管刑獄公事舊更有推官勘主外勘公事今竝存

大理寺官

大理寺判官或一員兩員不定少卿一員以他官權詳斷官十二員法直官一員以流內人任之年滿得京官

三班院

國初承舊制有東頭供奉官左右班殿直殿前承旨凡三班隸宣徽院第其任使熙寧四年始別置三班院以

崇儀副使尉進掌之効其勞績授以內外之任其名籍仍隸宣徽後又增置左右班改殿前承旨為三班奉職舊有借職承旨改為三班借職復有殿侍隸焉自供奉官至殿侍凡六等此亦必白之三署郎漢百官表屬光祿勳有儀郎中郎侍郎郎中之類無員數所謂總領從官預聞政事者也

騏驎院

在京有騏驎院舊名天廡坊左右天駟各二監此外又

有毛馱尚退馬務馳坊養馳致遠務養牛驢

中貴帶將仕郎

祥符以前中貴人盡帶將仕郎階若太尉秦翰者左璫之名將累立戰功始以將仕郎內侍省內府承局今則

不問翰建彰國軍節

湘山野錄

禮部郎官

予治平初同判尚書禮部掌諸處納到廢印極多率皆無用按唐舊說禮部郎中掌省中文翰謂之南宮舍人

百日内須知制誥王元之與宋給事詩云須知百日掌
絲綸又謂員外郎為瑞錦窠員外郎廳前有大石諸州
府送到廢印皆於石上碎之又圖寫祥瑞亦員外郎廳所
掌今狐楚元和初任禮部員外郎有詩曰移石幾迴敲
廢印開箱何處送新圖是也今之廢印宜準故事碎之

春明退
朝錄

南郊置五使

每南郊大禮循唐制命五使宰相為大禮使學士為禮

儀仗使知開封府為橋道頓遞使而禮儀使本太常卿
事主事圖鹵簿使是其職也儀仗使排列之而鹵簿使
督攝之其職頗相通

資政殿學士大學士

景德中上欲優寵王欽若乃特置資政殿學士以處之
既而有司定議班在翰林學士下尋又置資政殿大學
士亦以王欽若為之而班在翰林承旨之上則資政殿
學士與大學士皆自王欽若始也

端明殿學士

後唐明宗不知書每四方章奏止令樞密使安重誨讀而重誨亦了曉大義宰相孔循特置端明殿學士二員班在翰林學士上以馮道趙鳳為之則端明殿學士自馮道趙鳳始也國初亦嘗制此職而班在翰林學士之下尋改為大明殿學士以侍郎程羽為之序立乃在樞密副使之下逮明道初復改承明殿為端明殿再置端明殿學士自宋綬始也

二

端明殿學士五代後唐時置國朝尤以為貴多以翰林學士兼之其不以翰院兼職及換職者百年間纔兩人特拜程戡王素是也

御史言事不白長官

御史臺故事三院御史言事必先白中丞自劉子儀為中丞始榜臺中今後御史所言不須先白中丞至今如此

龍圖閣官

本朝太宗御書及典籍圖書寶瑞之物並藏於龍圖閣而閣有學士直學士待制直閣故景德初杜鎬戚綸為龍圖閣待制不數年鎬遷龍圖閣直學士班在樞密直學士下至祥符中鎬又遷龍圖閣學士而班在樞密直學士上則本朝龍圖閣待制龍圖閣直學士龍圖閣學士皆自杜鎬始也又祥符末以崇文院檢討馮元為太子中允直龍圖閣則本朝直龍圖閣自馮元始也

天章閣官

本朝真宗御集御書並藏於天章閣天聖末始置待制以范諷為之景祐中又置侍讀以賈昌朝趙希言王宗道為之則本朝天章閣待制及侍讀自范諷賈昌朝等

始也

並青箱雜記

三館

唐兩京皆有三館兩各為之所以遂館命修撰文字而本朝三館合焉並在崇文院中景祐中命修總目則在

崇文院餘各置局他所蓋避衆人所見太宗實錄在諸王賜食廳真宗祥符中修冊府元龜王文穆為樞密使領其事乃就宣徽南院使廳以便其事自後遂修國史會要名曰編修院又修仁宗實錄而英宗實錄同時並修遂在慶寧宮使館領歷日周置修撰二員宰相為監修自置編修院以修撰一人主之而歷日等書皆歸編修院

三衙官

舊制侍御親軍與殿前分為兩司自侍衛司不置馬步軍都指揮使止置馬步軍指揮使以來侍衛一司自分為二故與殿前司列為三衙也五代軍制非無典法而今又非其舊制者多矣

同三品同二品

唐時始有同中書門下三品時中書令侍中皆正三品大歷中並升為二品晉天福五年升中書門下平章事為正二品國初樞密使吳延祚以父諱璋加同中書門

下二品用外品也

觀文殿

丁文簡公度罷參知政事爲紫宸殿學士即文明殿學士也文明本有大學士爲宰相之兼職又有學士爲諸學士之首後以文明者真宗之謚號也遂更曰紫宸近世學士皆以殿名爲官稱如端明殿資政殿是也丁既受命遂曰丁紫宸議者又謂紫宸之號非人臣之所宜更曰觀文然又是隋時殿名理宜避之蓋當時不知然

朝廷之事不可以不學也

知州判州

節度使爲三品刺史州爲五品唐內臣爲中尉唯屬大都督國初曹翰觀察司判潁州是以四品臨五品也品同爲知隅品爲判自後唯輔臣宣徽使太子太保僕射爲判餘並爲知州

通判

國朝自下湖南置諸州通判院非副貳又非屬官故常

與知州爭權每云我是監郡朝廷使我來監汝舉動為其所制太祖聞而患之下詔書戒勵使與長吏同押文書非與長吏同簽書者不得承受施行自此至今州郡往往與通判不和往時有錢昆少卿者家世餘杭人也杭人嗜蟹昆嘗求補外郡人問其所欲何州昆曰但得有螃蟹無通判處則可矣至今士人以為口實

並廬陵居士歸

田錄

東西頭供奉官

東西頭供奉官本唐從官之名自永徽以後人主多居大明宮別置從官謂之東頭供奉官西內具員不廢則謂之西頭供奉官

蛾眉班

唐制兩頭供奉官東西對立謂之蛾眉班國初供奉班於百官前列王溥罷相為東宮一品班在供奉班之後遂令供奉班依舊分立慶厯中賈安公為中丞以東西班對拜為非禮復令橫行至今初叙班分立百官班定

筆談

乃轉班橫行參罷復分立百官班退乃出參用舊制也

賜袂公服

文武陞朝官遇郊廟展禮諸大朝會並朝服起居並公服今百執事用常服上每歲誕節端午初冬各賜時服有差凡公服舊制雖冬賜亦祇單製至太祖皇帝在位訝其方冬而單衣詰諸有司對以遵用古法蓋前代之闕典上於是特命改製今公卿大夫之有袂公服自此

始也

賜狀元金吾衛士

蔡文忠公自為布衣時固已恢廓有大志而姿表秀異見者聳動祥符中擢進士為天下第一人真宗臨軒望其堂堂英偉進退有法大悅之顧寇萊公曰得人矣特詔給金吾衛士七人清道以為榮尋詔自今第一及第給金吾七人當直許出兩對引喝上聞公單貧傭僦僕隸故有此詔

特詔佩魚

陳堯咨以龍圖閣學士換觀察使自陳臣本儒生少習
俎豆今荷聖恩易以武弁願佩金魚以示優異特詔從

之

澠水燕談

兄弟封贈

天聖中詔每遇恩霈朝臣中兄弟俱該封贈者許列狀
陳乞特比常制例加優封叙從王子融請也

賜衣服

國朝之制文武官諸單闕在京者端午十月及聖誕節皆賜衣服其在外者賜冬衣祆遣使將之舊制在內者中書樞密察院節度使至刺史諸軍列校以上學士金吾駙馬各給袍有差而學士給黃獅子錦品極貴淳化中改給盤鵬法錦之衣暈錦之袍凡袍錦之品四曰天下樂暈錦以給樞宰親王皇族觀察使以上侍衛步軍都虞候以上節度使盤鵬法錦衣給學士中丞三司使觀察使以上軍頭團練使以上皇族將軍以上駙馬都

尉舊宰相翠毛鋼錦以給防團刺史軍主軍頭領刺史者黃獅子以給三司副使知開封府審刑登聞龍圖直學士簇欄錦之品十曰天下

闕

節度觀察使領部

署者次暈錦以賜尚書以上學士管軍者盤鵬以賜觀察使丞郎翠毛以賜閣門使以上防團刺史管禁軍者倒仙丹以賜刺史以上方勝宜男賜諸司使領郡以上盤毬雲雁賜諸司使方勝練雀賜河北河東陝西轉運使副使餘軍校復有黃獅子寶照之品焉

賜帶

腰帶凡金玉犀銀之品自樞宰節度使賜二十五兩金帶舊用荔枝帶松花倒子寶照之品作瑞草地毬路文方圓胯帶副以金魚賜中書樞密其武臣有宣徽樞密使者仍舊制學士三司使中丞觀察使管軍四廂主而下賜二十兩金帶知制誥賜犀帶塗金魚亦嘗賜金飾牯犀副金魚非常例凡面賜紫者給犀帶塗銀寶瓶帶其賜伎術官雖紫緣皆給金銀帶使出賜金束帶兩數

如其秩刺史而上受邊計者辭日亦賜二十兩金束帶
其赴任者出賜塗金銀帶諸司使至崇班出為邊城鈐
轄者亦賜金束帶十五兩二十兩凡二等惟駙馬都尉
初選尚賜白玉帶自親王皇族皆許通服士大夫金帶
雕玉白玉屏通牯犀帶

賜鞍轡

鞍轡除乘輿服黃金白玉雕玉玳瑁珍寶等鞍垂去鞞轡
有三領諸王或賜金鞍者得乘之宰相使相賜寶相花

鞵八十兩金塗銀裝銜鐙叅政副樞宣徽節度使駙馬
繡盤鳳襍花鞵七十兩陷銀銜鐙學士中丞三司使觀
察使麻皮錦鞵五十兩撒星素銜鐙復有三十兩決束
鞍以賜東宮官屬

重戴

重戴者大裁帽也本野夫巖叟之服以皂為之後魏孝
文帝自雲中徙代以賜百僚五代以來惟御史服之淳
化初宰相學士御史臺北省官尚書省五品以上皆令

服之

憲銜

唐德宗幸奉天還京諸州郡

關

例得假憲銜後至有郡

王者迄今用之

勅書樓

太祖朝令天下置勅書樓

並見楊文公談苑

賜飲宰相第

真宗朝歲時賜飲於宰相第兩省待制以上赴林尚書

以諫議大夫爲三司副使亦預既而并諸副使遂以爲
常王太尉闕會惟用大官之膳少加堂餐自丁晉公助
一家饌今皆踵之

賜金帶

國朝翰林學士得服金帶朱衣吏一人前兩府則朱衣
吏兩人金笏頭帶佩金魚謂之重金居兩制久者則曰
眼前何日赤腰下甚時黃處內廷久者又曰眼赤何時
兩腰黃甚日重

真宗幸呂文穆宅

文穆有大第在洛中真宗祀汾時常駕幸正廳其後人不敢復坐閑以闌干設御榻馬即今張文孝公宅是也

並見倦遊錄

事實類苑卷二十五

欽定四庫全書

事實類苑卷二十六

宋 江少虞 撰

官職儀制

賜毬露金帶

毬露金帶俗謂之笏頭帶非二府大臣不得賜武臣而得賜者惟張耆為樞密使李用和以元舅王貽永為駙馬都尉李昭亮亦戚里四人者皆兼侍中出於特恩

東齋

記事

職田

天聖七年晏元獻公奏朝廷置職田蓋欲稍資俸給其
官吏不務至公以差遣徇私僥倖者極衆屢致訟言上
煩聽覽欲乞停罷時可其奏但令佃戶逐年收課利類
聚天下都數紐價均散見任官員至九年二月忽降勅
國家均敷職田以勵清白向因僥倖遂行停罷風聞縉
紳之間持廉守道者甚衆苦節難守宜布明恩悉仍舊
貫審官三班流內銓今後將有無職田處均濟公平定

奪差遣不得徇私

湘山野錄

賜常參官冬衣

建隆二年十月賜近臣冬衣有司言累代故事止賜將相學士諸軍大校太祖曰不賜常參官甚無謂也宜亦賜之自是文武常參官悉賜冬衣自此始

玉壺清話

宰樞聚廳見客

王元之常謂宰相于政事堂樞密於都堂同時見客不許本廳私接識者以為是疑大臣以私也遂寢或以元

之所請為當但難其率宰相于政事堂共見耳其後二府乞以朝退時聚廳見客以杜請謁從之率如元之言

澗水
燕談

二

天禧中宰臣奏中書樞密院接見賓客然兩府慎密之地亦欲咨訪天下之良楛早暮接待勿滯留機務又分廳言事各有異同欲今後中書樞密院每有所在外得替又在京主執臣僚如有公事並逐日於巳時以前聚

廳見客已分廳即俟次日急速者不在此限非公事不

得到中書樞密院

玉壺
清話

學士預曲宴承旨預肆赦

故事便殿宴勞將帥翰林學士預坐開寶中閣門使梁
迥輕鄙儒士啟太祖以曲宴將相安用此書生輩遂罷
之淳化中蘇易簡知政事始引故事為請自今後當直
學士與樞密直學士並預長春殿曲宴又引元明承旨
廳記御樓肆赦惟承旨得升丹鳳樓之西南隅楊文公
談苑

前兩府白事宰相掇案

熙寧中曾孝寬以端明殿學士簽書樞密公事未幾以父魯公解去服除判司農事舊例百官以事至中書即宰相據案百官北向而坐前兩府白事即宰相案去叙賓主東西行坐時謂之掇案及孝寬之至司農也吳正憲公當國不以前兩府禮待之每至中書不為掇按自後每有建白止令同判寺太常博士周直孺請中書孝寬不至矣正憲頗疑之未幾除直孺為兩浙提刑以張

堞判寺事堞為翰林學士班在端明之上乃本寺官長也異時白事皆堞詣中書而孝寬亦竟不至於是正憲知其果以掇案為嫌而出譏其隘矣

兩制下獄

仁宗朝兩制近臣得罪雖有贓污亦止降為散官無下獄者旋亦收叙熙寧初龍圖直學士祖無擇始以臺官下秀州獄是時鄭獬知杭州上章救解言甚切直自後許將沈季長劉奉世舒亶相繼下臺獄而天下習熟見

聞莫有為之救解者

東軒筆錄

前任班超辨

唐朝

闕

闕則補之後唐長興二年詔諸州得替節

度防禦團練副使並令隨常朝官逐日立班二年放免

常朝令五日起起居國初尚多前資官令閣門儀制尚

有見任前任防禦團練使

倦遊
襟錄

節度使罷除降麻不降麻

真宗時丁晉公謂自平江節度使除兵部尚書叅知政

事節度使當降麻而朝闕惜之遂以制除近者陳相執中罷使相除僕射乃降麻龐籍罷節度使觀文殿學士又不降麻蓋無定制也

樞密使除罷降麻不降麻

嘉祐二年樞密使田公况罷為尚書太丞觀文殿學士兼翰林院侍讀學士罷樞密使當降麻而止以制除蓋往時高若訥罷樞密使所除官職正與田公同亦不降麻遂以為故事

二

漢乾祐中除樞密使始降麻如將相之制本朝循之石元懿罷為僕射亦降麻高文莊曰宣簡呂寶臣罷止舍

人院出

春明退
朝錄

三衙官不敢謁舍人逢之則立馬

寶元康定之間余自貶所還過京見王君貺初作舍人自契丹使歸余在坐見都知押班殿前馬步軍聯騎立門外呈榜子稱不敢求見舍人遣人謝之而去至慶厯

三年余作舍人此禮已廢然三衙管軍臣僚于道路相逢望見舍人呵引者即歛馬駐立前呵者傳聲太尉立馬即遣人謝之比舍人馬過然後敢行後官於外十年而還遂入翰林學士見三衙呵引甚雄不復如當時與學士相逢分道而過更無歛避之禮蓋兩制漸輕而三衙漸重

有偶出一時而為故事者

朝廷之制有因偶出一時而遂為故事者契丹人使見

辭賜宴雜學士員雖多皆赴坐惟翰林學士祇召當直一員餘皆不赴諸王宮教授入謝祖宗特偶因便殿不御袍帶見之至今教授入謝必俟上入內解袍帶復出見之有司皆以為定制也

三班喫香羣牧喫糞

三班院所領使臣八十餘人蒞事於外其罷而在院者常數百人每歲乾元節釀錢飯僧進香合以祝聖壽謂之香錢判院官常利其餘以為養錢羣牧司領內外坊

監使判官比他司俸入最優又歲收糞壑錢頗多以充公用故京師為之語曰三班喫香羣牧喫糞是也

官稱訛謬

官制廢久矣今其名稱訛謬者多雖士大夫皆從俗不以為怪皇女為公主其夫必拜駙馬都尉故謂之駙馬宗室女封郡主者謂其夫為郡馬封縣主者為縣馬不知何義唐制三衙有司階司戈執干執戟謂之四色官今三衙廢無官惟金吾有人每日為正衙放朝唱不坐

直謂之四色官尤可笑也

樞密使侍宴賜衣循唐舊

國朝之制大宴樞密使副不坐侍立殿上既而退就御厨賜食與閣門引進四方館使列坐簾下親王一人伴食每春秋賜衣門謝則與內諸司副使班於垂拱殿外廷中而中書則別班謝於門上故朝中為之語曰厨中賜食階下謝衣蓋樞密使唐制以內臣為之故常與內諸司使副為伍自後唐莊宗用郭崇韜與宰相分秉政

文事出中書武事出樞密自此之後其權漸盛至本朝
遂號為兩府事權進用祿賜禮遇與宰相均惟趨內朝
侍宴賜衣等事尚循唐舊制其任隆輔弼之崇而雜用
內諸司故事使朝廷制度輕重失序蓋沿革異時因循
不能釐正也

歸田錄

禮遇講讀官

崇政殿之西有延義閣南向近陽門之北有通英閣東
向皆講讀之所也仁宗皇帝新即位多御延義閣每初

講讀終篇則宣二府大臣同聽賜飛白書或遂賜宴其
後不復御延義專御邇英春以二月中起至端午罷秋
以八月中起至冬至罷講讀官移門上賜食俟後殿公
事退繫闕以入宣坐賜茶就南壁下以賜坐復以次起
講讀之宣坐賜湯其禮數恩渥雖執政大臣亦莫得與

也

滄水
燕談

堂劄子

唐中書指揮謂之堂帖子曾見唐人堂帖宰相簽押如

今之堂劄子也

宣頭

予為史館檢討時樞密院劄子問宣頭所起余按唐故事
中書舍人職掌詔誥皆寫四本一本為底一本為宣
此宣謂行出耳未以名書也晚唐樞密使自禁中受旨
出付中書即謂之宣中書丞受錄之於籍謂之宣底今
史館中尚有梁室底三卷如今之聖語簿也梁朝初置
崇政院專行密命至後唐莊宗復樞密使郭崇韜安重

誨為之始分領政事不關由中書直行下者謂之宣如
中書之勅小事則廢發頭子擬唐帖也至今樞密院亦
用劄子中書劄子宰相押字在上次相及參政以次向下
樞密劄子樞長押字在下副二以次向上以次為別頭
子繼給驛馬之類用也

湘山野錄

宣勅

樞密院問龍宣故事具故申院按今有梁朝宣底二本
載朱梁貞明四年三年事每事下有月日云臣李振宣

或除官差官或宣事於方鎮等處其間有云宣頭宣命
宣旨者梁朝以樞密院為崇政院始置使以大臣領之
任以政事貞明四年李振為使當時以宣傳上旨故名
之曰宣而樞密院所出文字之名也似欲與中書勅並
行雖無所明見疑降宣始自朱梁之時晉天福五年改
樞密承旨為承宣亦似相合其底乃底本也係日月姓
名者此所以為底本今尚仍舊名熙寧七年六月十三
日或問今之勅起於何時按蔡邕獨斷曰天子下書有

四一曰策書二曰制書三曰詔書四曰戒勅然自隋唐以來除改百官必有告敕而從勅字予家有景龍年敕其制蓋須由中書門下省故劉禕之云不經鳳閣鸞臺何謂之敕唐時政事堂在門下省而除擬百官必中書令宣侍郎奉舍人行進入畫勅字此所以為勅也然後政事堂出牒布於外所以云牒奉勅云云也慶厯中予與蘇子美同在館子美嘗攜其遠祖珣唐時勅數本來觀與予家者一同字書不載勅令非近世所用也

春明退朝

錄

百官拜宰相

百官於中書見宰相九卿而下臺省吏高聲唱一聲屈則趨而入宰相揖及進茶皆抗聲贊喝謂之屈揖待制以上見則言請某官吏不屈揖臨退仍進湯皆於席面南橫設百官之位升朝坐京官以下皆立後殿引臣僚則待制以上宣名拜舞闕官但贊拜不宣名不舞蹈中書略貴者不示與之抗也上前則略闕者殺禮也

籠門謝

唐制丞郎拜官即籠門謝今三司副使以上拜官則拜舞蹈于門下百官拜于門下亦不舞蹈此亦籠門故事

也

湘山野錄

都堂及寺館百官會集坐次

都堂及寺館百官會拜坐次多出臨時唐以前故事皆不可考惟顏真卿與左僕射定襄郡國王郭英文書云宰相御史大夫兩省五品供奉官自為一行十二衛大

將軍次之三師三公太僕少師保傅尚書左右丞侍郎
自為一行九卿三監對之從古以來未嘗參錯此亦略
見當時故事今錄於此以備闕文

湘山野錄

請修時政記

梁修撰周幹一歲後苑燕從臣各探韻賦詩得春字曰
百花將盡牡丹折十雨初晴太液春上特稱之為史館
修撰上疏自今崇德長春二殿皇帝之言侍臣論列之
事令中書修為時政記其樞密院使涉機密亦令本院

編修至月終送史館其餘百司凡于對拜除授沿革之
事悉條報本院仍令舍人分直皆從之

玉壺
清話

宰相許纔午歸第

太祖受禪以趙韓王普有佐命功勲除右諫議大夫樞
密直學士未幾范質罷相以公為門下侍郎平章事既
冠台符參總朝權參政李餘慶薛居正雖副之但奉行
制書備位而已不宣制不預奏事不押班每候對長春
殿啓沃小大之務盡決於公兼權之議喧于時論會李繼

遷擾邊用公計封趙保忠守夏臺闕池令滅之保忠反

與繼遷合謀大為邊患河西極撓罪歸於公因不得專

政詔令叅政長史即押班奏事分其權也舊制宰相報

到未刻方出中闕會歲大熟特許云纔午歸第遂為永

制玉壺
清話

丁晉公自節度使以制除叅政

丁晉公自保信軍節度使知江寧府召為叅知政事中
書以丁節度使召學士草麻時盛文肅為學士以為叅

知政事合用舍人草制遂以制除丁甚恨之

倦游
錄

納節不降麻

唐制節度使僕射尚書侍郎謂之納節皆不降麻止舍人院出制天禧中丁晉公自保信軍節度使除吏部尚書參知政事先公在西閣當制至和中韓魏公自武康軍節度使除工部尚書三司使降麻非故事也

請立家廟者子孫襲三品階勲及爵

皇祐中宗袞請置家廟下兩制禮官議以為廟室若當

靈長身歿而子孫官微則廟隨毀請以其子孫襲三品階勲及爵庶常得奉祀不報

文武官朝參

唐在京文武職事九品以上朔望日朝其文官五品以上官及監察御史員外郎太常博士每日參武官五品以上仍每月五日十一日二十一日二十五日參三品以上九日十九日二十九日又參其長上折衝果毅若文武散官五品以上直諸司及長上者各准職事參其

昭文館及國子監博士每季叅若雨露沾服失容及泥
潦並假以上唐儀制凡今在京百司有常叅官謂五品
以上職事八品以上供奉官以上唐大典貞觀元年勅
文官充翰林學士皇太子諸王侍讀武官充禁軍職事
並不常朝叅其在三館等諸職掌者並朝叅訖各歸所
務是年御史中丞竇闕奏常叅文官准令每日叅自艱
難以來遂許分日得待戎事稍平即依常式其武准令
五品以上每月六叅三品以上每月六叅二品以上更

加三參頃並停廢今請准令却復舊儀十三年御史奉

奏諸司常參文官隔三日益以橫行參假其武班每日

先配九參六參

九參謂一月九次
六參謂一月六次

今後每經三節假滿

縱不是配八日並令文官例橫行參假

以上唐
要典

後唐同

光二年四方館參令後除隨駕將校及外方進奉專使

文武兩班三品以上官可於殿內對見其餘並詣正衙

從之天成元年御禮文武百僚每日正衙常朝外五日

一赴內殿起居每月朔望日賜廊下食唐室太平時常

叅官每日入朝謂之廊餐自乾符離亂罷之惟月旦入閣日賜食明宗即位請文武百僚五日一起居見對於便殿李琪以為非故事以五日為緊請每月朔望日入閣賜廊下食罷五日起居之儀至是宣旨朔望閣外五日一起居遂以為常天成元年勅今後若遇不坐正殿未御內殿前便令閣門使傳宣不坐朝班退是年御史臺奏凡新除官及差使者合於正衙謝辭若遇內殿起居日百官不於正衙叙班其差使及新除官辭謝不得

合參謝每內殿起居日百僚先叙於文明殿庭後謝官
退則班入內殿從之晉天福二年中書門下奏在廷諸
司使等每除正官諸令赴正衙謝後不赴常朝其京官
未升朝官祇赴朔望日朝班從之國朝諸在京升朝官
每日朝其制免常朝者五日一參起居國朝令文掌唐
制文武職事官並赴常參武班五日一參又有三日一
參五日參為朔望為六參三日參乃九參所謂常參官
未有無闕者由後唐同光中乃常朝內殿凡隨駕官將

校及外方進奉使文武三品以上官即于內殿對見其餘並詣正衙至天成初詔文武百官每日常朝外五日一赴內殿起居其趨朝官遇宣不坐放朝各退歸司本朝之制文德殿曰外朝以不釐務朝臣日赴是謂常朝垂拱殿曰內殿宰臣樞密以下要近職事者并班闕日赴是謂常起居每日文武朝臣釐務不釐務並赴內朝謂之百官大起居是則奉朝之制自為三等蓋天子坐朝莫先於正衙殿于禮羣臣無一日不朝有故正衙雖

不坐常參官獨立班後放朝乃退

凡有職事謂之常朝
今格外朝不釐務者

謂之
常參

參假橫行之禮

舊制凡連假三日而著於令者宰相至升朝官盡赴文德殿參假為之橫行次日百官乃赴內殿起居闕年連假後多便起居而廢橫行之禮

宰執押知印

開寶六年六月敕參知政事薛居正李餘慶於都堂與

宰臣趙普同議公事是月又勅中書門下押班知印及祠祭行香今後宜令宰臣趙普與參知政事薛居正李餘慶輪知七月既而復有釐革

二

雍熙四年文德殿前始置參政位在宰相之後至道中寇萊公為參知政事復與宰相輪日知印正衙押班簿位遂與中書門下一班書勅齊列衙街衢並馬宰相使相上事并有公事並升都堂後萊公罷遂詔令宰臣押

班知郎叅政止得輪祠祭行香正衙位次宰臣之下立
究有公事並與宰臣同升都堂如宰臣使相上事即不
得升景德四年六月勅臣僚自外到闕及在京主執如
有公事並逐日於巳時以前中書樞密院聚廳相見其
後復分廳見客慶厯八年禁止之如景德之制

賜笏頭帶

太宗制笏頭帶以賜輔臣其

闕

服之至祥符中

趙文公罷叅知政事為兵部侍郎後數載除景靈宮副

使真宗廷賜御仙花帶與繡韉服御仙帶自後二府罷者學士與散官通服此帶遂以為故事予嘗見蔡文忠公罷叅知政事為戶部侍郎服此帶蓋曾為學士用昭

文金帶曾經賜者許繫之

沂公為翰林及侍讀學士三
清遂落職為中書舍人初舊

服闕皆如此景祐
三年八月方明

其宰相罷免雖散官并衣舊服笏帶

闕文定公天聖中自秘書監來朝除刑部侍郎并服笏

帶其後有罷叅政者黑帶佩魚而入非故事也入兩府自黑帶賜笏帶者太宗朝甚多祥符中張文節自待制

為中丞而叅知政事天聖中姜侍郎自三司副使為諫
議大夫而樞密並賜如上

以上皆春
明退朝錄

事實類苑卷二十六

欽定四庫全書

事實類苑卷二十七

宋 江少虞 撰

官職儀制

對別判銓

吏部流內銓每除官皆去權判正衙謝後正衙前殿引
選人謝辭由唐以來謂之對別判銓與選人同入起居
畢判銓於殿前近北西向立選人謝辭訖出判銓官亦
謝而出近止令選人門謝辭判銓不復入

罰俸例

罰俸例一品八貫二品六貫三品五貫四品三貫五百
五品三貫六品二貫七品一貫七百五十八品一貫三
百九品一貫五十

除節度使例

外臣除節度使景德中以前止舍人院作制楊文公外
制集載潘羅支廝鐸督朔方軍節度使數制是也其後
遂學士院降麻如大禮加恩在將相後數日方下然不

鎖院不宣麻近年遂同將相例鎖院告庭矣

尚書以下不得鞞鞋過都堂門

尚書省舊制尚書侍郎官不得着鞞鞋過都堂門

諫議班

諫議班在知制誥上若帶制則在知制誥下從職也戲

語謂之帶墜

並見春明退朝錄

五司廳

余為鄜延經略使日新一廳謂之五司廳延州正廳乃

都督廳洎延州事五司廳治鄜延路軍事如唐之使院也五司者經略安撫總管節度觀使也唐制方鎮皆帶節度觀察處置三使今節度之職多歸總管司觀察歸安撫司處置歸經略司其節度觀察而按并支掌推判官今皆治州事而已經略安撫司不置佐官以帥權不可不專也都總管副總管鈐轄都監同簽書而皆受經略使節制

銀臺司

銀臺司兼門下封闕乃給事中之制當隸門下故事乃
隸樞密院下寺監皆用劄子寺監具申雖三司亦言上
銀臺主判不以官品初冬獨賜翠七錦袍學士以上自
從本品行案用樞密院襍司人吏主判食樞密厨蓋樞
密院子司也

步行學士

叔闕鑑闕皆自左掖門下馬入館當時謂之步行學士

嘉祐中於崇文院置編校局授官皆許乘馬至門院後

其中書五房習學公事官緣例乘馬赴局

衛士

車駕行幸前驅謂之隊即古之清道也其次衛仗衛仗

者視

闕

入宮門法則古之外仗也其中謂之禁圍如殿

中仗天官掌舍無宮則供人門今謂之殿門天武官極

天下長人之選八人上御前殿則執鉞立於紫宸門下

行幸則為禁圍門行子仗馬之前又有衡門十人隊長

一人選諸武士力絕倫者為之上御後殿則執撾東西

對立於殿前亦古之虎賁人門之類也

三司使班

三司使班在翰林學士之上舊制權使即與正同故三司使結銜皆在官職之上慶厯中葉道卿為權三司使執政有欲抑道卿者降勅時移權三司使在職下結銜遂立翰林學士之下至今為例後嘗有人錯列結銜雖依舊而權三司使初除閣門取旨間有叙學士上者然不為定例

三告官打杖子持藤杖

三司開封府外州官長升廳事則有衙吏前道告喝國朝之制在禁中惟三官得告宰相告於中書翰林學士告於本院御史告於朝堂皆用朱衣吏謂之三告官所經過處閹吏以挺叩地警衆謂之打杖子兩府親王自殿門打至本司及上馬處宣徽使打於本院三司使知開封府打於本司近歲寺監長官亦打非故事前宰相赴朝亦有旨許張蓋打杖子者係臨時指矚執絲梢鞭

入內自三司副使以上副使惟乘紫總暖坐從人隊長
特執木挺自待制以上近歲寺監長官持藤杖非故事
也百官儀範著令之外諸家所記尚有遺者雖至猥細
亦一時儀物也

功臣號

賜功臣號始於唐德宗奉天之後自後藩鎮下至從軍
資深者例賜功臣本朝惟以賜將相熙寧中因上皇帝
尊號宰相率同列面請三四上終不允曰徽號正如卿

等功臣何補名實是時吳正憲為首相乃請上功臣號
從之自是羣臣相繼請闕遂不復次並筆

按察之職

舊制轉運使官銜帶按察二字慶厯中沈邈薛坤為京
東轉運使按察使欲令獲吏民之情乃請部吏之險猾
者四人尚同李孝先徐九思孔宗旦俾偵伺一路而四
人者怙權恣睢頗致騷擾時謂之山東四佞王達楊紈
王鼎皆為轉運按察使尤苛虐多任耳目以害官吏時

謂之江東三虎仁宗知其事下詔戒勅削去按察二字
後澆風漸革而士大夫務崇寬厚無復暴察之名矣至
熙寧中執政建言天下官吏皆持祿養交政事類靡務
相容貸盖由在上無督責之實於是出臺閣新進分按
諸路謂之察訪既而又分三院御史為六察官領六察
按以督舉中外事自是按察之政復行矣

東軒
筆錄

帶侍讀學士出外

故事侍讀學士無帶出外張知白罷叅知政事授此職

知大名府然非歷二府而出者不得為寶元中梅詢始帶知鄭州自後兩制遂為例

見東齋記事

三司屬官兼直館

韓國華字光弼相州人為右司諫鹽鐵判官每歲後苑賞花三館學士皆預國華與潘大初封對自言任兩省

清官兼計司職不得侍曲宴即日命直昭文館後三日

苑宴即命陪預三司屬官兼直館自國華等始

見范蜀公蒙求

罷二府大禮進官

建隆至天禧每朝廷大禮二府必進官天聖二年南郊
呂許公懇言之乃止自是加恩而已

加食邑

每大禮兩府加恩功臣階勲食邑實封內直三種學士
至待制大兩府得階勲而下二種皆大卿監至少卿監
一種得加食邑郎中而下京朝官一種階勲而已凡加
食邑宰相千戶實封四百戶餘降麻官食邑五百戶實
封二百戶舍人待制散尚書至少卿監已上食邑三百

戶實封二百戶凡實食邑三百戶封縣開國男五百戶
封子七百戶封伯一千戶封郡侯二千戶封公五千戶

以上始
加食邑

封贈

凡朝官父在經大禮推恩得致仕官不給俸父任升朝
官以上致仕自得俸舊制若因其子更加秩即不給俸
凡宰相使相母封國太夫人妻封國夫人樞密使副使
叅知政事尚書節度使母封郡太夫人妻封郡夫人

樞密

使叅政母經南直學士以上給諫大卿監觀察母封郡
邾封國太夫人

太君妻封郡君舊制學士官至諫議大夫以上方得郡封

天禧中改之少卿防團以下至升朝官母封縣太君妻

封縣君凡輔臣宣徽初入封三代東宮三少曾祖為少保祖為少

傳父為少師因進官或遇大禮進加至太師兩令國公使相

節度亦封三代尚書資政殿大學士三司使封二代至

太尉大學士自加兩府例學士至待制封一代至太尉餘升

朝官以吏部尚書父歷兩府贈至太師令國公歷兩制大禮者贈至太尉

掌選官限內不朝

唐兵部吏部侍郎官選限內不朝今審官東西院三班院皆預內朝而流內銓止趨五日起居疑循舊制

使相節度使不領京師官局

祖宗朝使相節度使未嘗有領京師官局者其奉朝請必改他官多為東宮三少上將軍統軍趙中令以使相自河陽還除太子少保至明道中錢相始為景靈宮使治平中武康節度使李公端愿始為溫泉觀使真宗時東

封西祀奉祀皆輔臣為五使南

關

用學士仁宗

關

田

恭謝大饗明堂祫饗上饗並循真廟之制

罷相得職

祖宗時宰相罷免惟趙中令得相餘多本官歸班參樞

亦然天禧中張文節始得侍讀學士知南京天聖

關

文

康以資政學士知陝州自慶厯後解免罷卒皆得職焉

帶禁職出外任

祖宗時惟樞密直學士帶出外任李尚書維罷翰林為

集賢院學士知許州劉中學儀自翰林為臺丞學憲壬戌以翰林推三司使皆斬出並以樞密直學士判知潁州李知洪判蔡文忠以翰林兼侍讀兩學士改龍圖閣學士知密州自翰林龍圖閣而出潘由文忠始也近歲帶侍讀及端明學士邢公弼以侍讀學士知曹州孫宣公亦以侍讀知兗州二公皆久奉勅合勸講遂聽以其職補外自張文節始舊輔臣帶侍讀出守至寶元中梅公詢始以侍讀學士知許州侍讀帶外任自梅公始也其

後翰林出者率皆換此職晁文元公天禧中自翰林承旨換集賢院學士判西京普臺吳正肅公皇祐中以資政殿學士李少師公明嘉祐中以龍圖直學士並換集賢判西臺近歲皆以禁職分臺

二府相壓

二府舊以官相壓李文正公自文明殿學士工部侍郎為叅知政事而宋惠安自左諫議大夫叅知政事為刑部尚書居其上至拜王沂公與張文節公叅知政事

王轉給事中張轉工部侍郎兩班沂公下意頗不悅乃復還二卿之命止以舊官優加階邑自後第以先後入為次第

未有磨勘轉官

祖宗時未有磨勘每遇郊祀等恩皆轉官未滿二載者不轉官例加五階王黃州自知制誥未有勲便加柱國在滁州為散郎自承奉加朝散大夫階

不隔磨勘遷官

太宗時始置磨勘差遣院後改為審官真宗時京朝官四年乃得遷天聖中方有三年之制而在外任者不得遷須至京引對乃得改秩明道中始許外任歲滿亦遷時恭謝天地覃恩不隔磨勘有併進者於是朝士始多皇祐覃恩磨勘人情若其不均英宗與神宗即位故復用恭謝之例

太常卿秘書監

先公嘗言太常卿不是卿秘書監不是監以其職列清

重不與諸卿監侔耳唐室士大夫多尚臺省官不樂九
卿故目秘書監為宰相病坊少監為給舍病坊然中秘
書崇典籍有麒麟天祿二閣為藏書之所歷代名居禁
中亦曰中書兩漢劉向楊雄皆典校於其內東漢班固
為蘭臺令史尚為美職况監令乎故其秩甚重迄今班
在太常宗正之下七寺卿之上是以名儒宿老不務趨
競者多樂就此任唐白樂天劉夢得薛逢皆數歷焉不
可一一悉記吾為翰林學士承旨日厲以病嘗語同列

云禁中視草非養病之地他日解職得遂大監之拜歸
十數畝之園入就三品之列為國家典掌圖籍於九流
百氏之中優游以為老則甚幸也寧期遭逢明聖叅預
輔相此固非平昔之覬望也諸子因上問曰太常卿班
列如何公曰太常卿在六尚書之下其資望與吏部尚
書同每入朝隨尚書立班與尚書承郎同幕次故太常
卿舍為尚書裏行者蓋為此也少卿即寄郎中幕次博
士即寄員外幕次卿與少卿每入幕次皆橫行獨據一

榻向門而坐他卿不得並也

建隆班簿

建隆三年十二月班簿計二百二十四員文班一百五十人內南班一百一十人兩省二十七人學士三人留司十人武班七十四人內留司一十二人

以上並春
明退朝錄

吏祿

天下吏人素無常祿惟以受財為生往往有致富者熙寧三年始制天下吏祿而設重法以絕請託之弊是歲

京師諸司歲支吏祿錢三千八百三十四貫二百五十四歲歲增廣至熙寧八年歲支三十七萬一千五百三十七貫一百七十八自後增損不常皆不過此數京師舊有祿者及天下吏祿皆不預焉

春明退
朝錄

食邑滿萬戶封國公

舊制將相食邑萬戶即封國公王太尉為相遇萬戶而謙抑不受慶曆七年南郊中外將相惟夏鄭公滿萬戶上書請封英國公因詔使相未滿萬戶皆得封於是王

康靖追封遂國公章文簡封郇國公王武恭封英國公
其後遂以邑封合萬戶者徹國

二

國朝以封采封國者范侍中魯王文獻祁向侍中拱譙
秦靜難節度劉公重進燕保大節度趙公贊衛定國節
度馮公總業梁張侍中永德鄧衛張尚書詔鄭陳孟中
令景秦王中令彥超邠趙中令梁許魏呂文穆徐許寇
忠愍萊丁秩監晉馮文懿魏章文簡郇曹襄悼韓魯蘄

王文穆冀張榮禧岐鄧李呂文靖申許王文正沂張文
懿鄒鄧夏文莊英鄭王文康遂鄧王武恭祁魯賈文元
安許魏陳恭公英岐文侍中路杜正獻祁宋元憲呂鄭
龐莊敏英韓侍中儀衛魏曾侍中英魯富相祁鄭

宰相自草奏擬狀

余嘗求得後唐閔帝應順元年案檢一道乃除宰相劉
昫并判三司堂檢前有擬狀云具官劉昫伏以劉昫經
國才高匡君志切方屬體元之運實資謀始之規宜注

宸衷委司判計漸期庶富永贊聖明臣等高闕望授依
前中書侍郎兼吏部尚書同中書門下平章事充集賢
殿大學士兼判三司散官勲封如故未審可否如蒙許
允望付翰林降制處分謹錄奏聞其後有制書曰宰臣
劉昫可兼判三司公事宜令中書門下准此四月十
日用御前新鑄之印與今政府行遣稍異本朝要事對
稟常事擬進入書可然後施行謂之熟狀事速不及待
報則先行下具制草奏知謂之進草熟狀白紙書宰相

押字他執政具姓名進草即黃紙書宰相臣報政皆於
狀背押字堂押檢宰執皆不押惟宰相檢皆書押堂吏
書名印用此擬狀有詞宰相檢押不印此其為異也大
率唐人風俗自朝廷下至郡縣決事皆有詞謂之判則
書判科是也押檢二人乃馮道李愚也狀檢瀛王親筆
甚有改竄句抹處按舊五代史應順元年四月九日己
卯鄂王薨庚辰以宰相劉昫判三司正是十日與此檢
無差來次道記開元宰相奏請鄭敏鳳池葉草擬狀注

制集悉多用四六皆宰相自草今此擬狀馮道親筆蓋故事也

宰相奏擬狀

唐宰相奉朝請即退延英止論故事大體某進擬差除但執熟狀書可今所存有開元宰相奏請狀二卷鄭敏鳳池葉草內載兩為相奏擬狀數卷秘府有擬狀注制十卷多用四六紀其人履歷往行諭請皆宰相自草五代亦然寇萊公謂楊文公曰予不能為唐宰相蓋懶於

詞命也今中書進呈差除退即批聖旨而因列押字國
初范魯公始為之

宰相上殿命坐賜茶

舊制宰相早朝上殿命坐有軍國大事則議之常從容
賜茶而退自謂號令除拜刑賞廢置事無巨細並熟狀
擬進入于禁中親覽批紙尾用御寶可其奏謂之印

止降出奉行而已由唐室歷五代不改其制抑古所
謂坐而論道者歟國朝范魯公質王宮師溥魏相仁浦

皆在相位上雖傾心眷倚而質等自以前朝舊相憚太祖英武具劄子面取進止朝退各疏其事所得聖旨臣等同署字以志之如此則盡稟承之方可免妄設之失帝從之自是奏御寢或至盱昃啜茶之禮尋廢固弗暇於坐論矣于今遂為定或自魯公始也

並出金坡遺事

提舉宮觀

天聖七年玉清宮成遂罷輔臣為宮觀事使而景靈會靈祥源三宮觀以學士舍人管幹康定元年李康靖公

罷叅知政事為資政殿大學士提舉會靈觀自後學士
皆為提舉至和初晏元獻公以舊相為觀文殿大學士
提舉景靈觀而當時有武臣令致政李少師端愿為觀
察使止管幹祥源觀自陳於樞密府宗袞宋元憲也謝朓謂謝安為
袞乃加以都管當今朝官亦云提舉非故事也

樞密副使同知不並置

本朝置樞密使副或置樞密院同知院然使副與知院
不並置也熙寧元年文潞公品宣徽為使而潤州陳宰

相自越州召為知院前一歲陳丞相為副使位在呂公之上故也

文臣為樞密皆帶檢校官

太平興國四年石元懿始以樞密直學士簽書院事八年張司空齊賢王公沔並以諫議大夫同簽書樞密院事治平二年令郭宣徽為同簽書院事文臣為樞密使皆帶檢校太尉太傅兼本官乾興元年錢文禧以兵部尚書為樞密使不帶檢校官有司之失也

相員

國初范魯公王沂公魏僕射三相罷趙令獨相始置叅
知政事自是一相或二相至咸平中始有呂文穆李文
靖向文簡三相又至至和中文潞公劉丞相富鄭公三
相


三司權使公事為兩等

咸平六年併三部為三司使官輕則為權使公事慶厯
中葉翰林再總計止云權使蓋中書誤也其後遂分權

使與公事為兩等

因例賜帶加服色

李西樞憲成為知制誥尚緋衣出守荆南召為學士閤門舉例賜金帶而不可加於緋衣乃並賜三品之服



事實類苑卷二十七

欽定四庫全書

子部

事實類苑卷二十八

詳校官編修臣周瓊

員外郎臣牛稔文覆勘

總校官中書臣朱鈐

校對官典簿臣劉景岳

謄錄監生臣鄧捷成

欽定四庫全書

事實類苑卷二十八

宋 江少虞 撰

官職儀制

武臣賜笏頭帶

太宗命創方圓毬路帶亦名笏頭帶以賜二府文臣明道初徐公為樞密使兼侍中獨得賜之皇祐初李侍中用和以叔舅獲賜時王侍中貽永為樞密院遂併賜之其後曹侍中亦以叔舅而賜焉

對賜

凡拜賜職入朝多有對賜拜官加勳封謝恩雖二府亦無有景德初王冀公以叅知政事判大名用召還加邑對時契丹方講好真宗欲重其事冀公入謝特命以衣帶鞍馬賜之自後二府轉官加階勳封邑入謝並有對賜

郊禮召耆德侍祠

皇祐二年仁宗始祠明堂范文正公時守杭州而杜正

獻公致政居南都蔣侍郎希魯致仕居蘓州皆年老體
尊范公建言朝廷盛禮宜召元老舊德陪祀供帳都亭
敦造就道二公卒不至加賜衣帶器幣賜一子出身自
是前兩府執政者大禮前闕有詔召之然亦無至者禮
畢皆賜衣帶器幣焉

二府拜恩詣景靈宮謝

文穆王冀公天聖初再為相既拜命謝恩即請詣景靈
宮奉真殿朝謝真宗皇帝冀公仍以五百千建置道場

說先公為齋丈其畧曰奉諱之初謝病於外臨西宮而莫及企南狩以方遙失其本餘不盡記自後二府初拜恩入謝即詣景靈踵冀公故事也

都省議事儀式

先公嘗言自太祖臨御以來百司人吏艱於選補由是臺省舊規漸成空墜吾前歲罷右僕射省中並非舊吏權私名散官三數人主掌按籍而已其舉措祇應山野樸陋詢省中故事則懵然莫知也適會勅下集五省官

議事省吏以狀白吾詢之三省官議事僕射入省乎曰
不知也臺省官與承郎尚書雜坐乎曰不知也又掌名
表名郎官與諫議御史何向而坐曰不知也左右丞與尚
書坐孰為主曰不知也吾為主客郎中掌誥是時吏部
尚書張公昭兵部尚書李公濤左丞趙公上交中丞劉
公溫叟致仕楊尚書昭以耆儒碩德俱在班列委陪諸
公於都省議事大凡在內廷論職不論官入都省論官
不論職如翰林學士文明學士樞密直學士三司副使

並同上帶兩省官及都省官遇議事之日入都省並綴

本班坐此論官不論職也

如郎中則向郎中坐
諫議則向諫議坐也

每議事

所司於都堂上陳帟幕具酒饌設左右丞坐於堂之東

北面南向設御史中丞坐於堂之西北面南向設六部

尚書侍郎坐於堂之東廂面西向設兩省尚侍給事諫

議坐於堂之西廂面東向

如兩省有侍郎則
改左在尚侍坐

設知名表

郎官坐於堂之東南面北向設諫議御史坐於堂之西

南面北向設左右司郎中員外坐於左右丞後設三院

御史坐於中丞之後設諸行郎中員外坐於尚書侍郎
之後設左右司諫正言坐給舍諫議之後並重行異位
故事左右僕射與侍中中書令是為四廂自唐開元之
後僕射叅知政事然非軍國大事本朝會議事之日三
省官早赴省次就所司先以議論呈諸官畧知大義然
後所司引知名表郎官執闕春黃卷即所議事升廳就
本位次引小兩省官就本位次引郎中員外就本位次
引三號御史就本位次引兩省官次引尚書侍郎次引御

史中丞各就本位然後左右丞升廳所司抗聲曰揖羣

官對揖訖各就本位知名表郎官以黃卷授所司所司捧

議左右丞

如左右丞闕即次判都省官一人事

左右丞執卷展讀訖然後

授於中丞於尚書侍郎迺遷展讀訖復授於名表郎官

始命茶酒進食

再行酒進食所司抗聲曰揖訖羣官方飲酒爵止於三行後以誼談不設

食

飲畢所司捧筆硯立於左右丞之前一吏抗聲曰讀定

訖左右丞捧筆叩首所司曰揖左右丞與羣官揖訖後

以一幅紙寫所議事即署名於其下迺遷於四坐諫議

御史命一吏抗聲曰有所見不同者請不押字

在坐如有異議

不問官位高卑並得進前論列候進止

設食訖所司復抗聲曰食畢揖羣

官對訖各降階出就本次以所議事可否共列狀進入以高者為表首如諸司三品以上並入省議事即諸司三品坐于尚書侍郎之東南官一品坐于尚書侍郎之前武班二品坐於給舍之南並同席異位如議大事僕射御史大夫入省惟僕射鞍轡至廳下馬餘官至門下馬設僕射大夫位於左右丞之前並行異位揖畢押字皆

僕射專之矣故徐騎省鉉博古之士多知典故亦言在江南見舊儒所說議事次第與吾畧同命寫一圖字授與省吏但不知此輩能遵行否

已上並見春
明退朝錄

南郊執仗兵士

梁開平二年南郊執儀仗兵士計二千九百七十人建隆四年南郊執儀仗兵士一萬三千六百人太常寺鼓吹等二千六百四人太僕寺擁駕兵士六百八十二人六軍執擎人員兵士五百五十二人左右金吾衛仗各

一百二十五人左金吾仗一百五十八人右金吾仗三百五十九人殿中省押番人員並執擎兵士共五百三十一人司天臺一百六十二人八同都司四千三百七十三人合兵部一萬七千四百三十三人

出金坡遺事

中書密院執政官非假日不得私第見客

慶曆二年九月丁丑知諫院蔡襄上言自今中書樞密院執政官非休暇日私第不得見客欲詢訪外事聽呼

召從之

見涑水記聞

太祖令文武羣臣入見謝畢乃得入正衙

舊制文武羣臣由一命而上自外至者必先詣正衙見訖乃得入辭謝亦如之太祖皇帝御極之初親總庶務常驛召一邊城入對將以方畧訝其到闕已數日而未見左右或奏以未過正判衙太祖意不平之乃令自今皆入見謝畢乃得詣正衙遂為定制

出涑水
記聞

樞密院別撰時政記

左右史所以記言動也然則王者之密畫切問弼臣之

僉諧獻納外庭分職莫克與聞則中書有時政記得以
詳述焉近制叅知政事二員共掌其任復有羣司上殿
奏事及親奉德音或出宸斷可以訓俗示後者月中錄
送中書同編纂編記奏御宣付史館景德祥符中知樞
密院王公欽若陳公堯叟請自今樞密院所覩嘉言美
德更不錄送中書願別為時政記從之

出金坡
遺事

譯經潤文使

太平興國中始置譯經院於太平興國寺延梵學僧入

院繙譯新經始以光祿卿湯悅兵部員外郎張公潤色之後趙文定楊文公晁文莊李尚書絳組皆為譯經潤文官天禧中宰相丁晉公始為使天聖三年又以宰相王冀公為使自後宰相繼領之然降麻不入御又以叅政樞密為潤文其事浸重每歲誕節必進新經前兩月三府皆集以觀翻譯謂之開堂亦唐之清流盡在也前一月譯經使潤文官集以新經進謂之開堂慶曆三年呂許公羅相以司闕為譯經潤文使明年致仕章郇公

代之自後乃降麻入御

太常寺官

太常寺國初以來皆禁林之長主判而禮院自有判院
司判院大中祥符中符瑞繁縟闕建禮儀院輔臣主判
而兩制為知院天禧末罷知院天聖中省禮儀院向寺
與院事舊不相兼康定元年置判司同判司寺並兼禮
儀寺近有置六七人者按太常置卿一員少卿二員博
士四員祥符中博士二員後加至四員今若置判寺一

員同判寺二員合唐之卿數矣天聖元年改同判院為
知院即博士也

宰相帶館職

唐制宰相四人首相帶太清宮使次三相皆帶館職弘
文館大學士監修國史集賢殿大學士以此為次序本
朝置三相昭文修史首相領焉集賢次相領焉三館職
惟修史有職事而頗以昭文為重自次相遷首相乃得
之趙令拜及獨相領集賢殿大學士續蕪監修國史久

之還昭文館薛文惠與沈恭惠並相薛自叅政領監修相仍舊而沈領集賢畢文簡與寇忠愍並相而畢領監修寇領集賢王太尉相並止領集賢近時王文惠龐莊敏初拜及獨相悉兼昭文修史二職非舊制也

大臣自使相除樞相罷節還舊官

大臣自使相除樞相罷節而還舊官景祐元年王沂公自使相帶檢校官復為吏部尚書同平章事充樞密使慶厯七年夏鄭公自使相入樞相仍帶節度使亦非舊

例也

大臣為使相節度使

太祖太宗時大臣為使相唯趙令一人真宗時寇萊公王冀公二人節度使李南陽一人乾興後難遽數矣

大臣換武

唐大臣武叅用袁滋自尚書右丞出華州刺史召為左金吾衛大將軍如是者數人本朝頗循其制工部侍郎王公明兼黃州刺史給事喬公維嶽換海州刺史三司

使尚書左丞李公士御換同州觀察使翰林學士工部
侍郎陳公堯咨換宿州觀察使如錢鄧州及慶厯初韓
范龐王四公皆換觀察使以用兵擢之也龍圖閣直學
士為李公良換奉州防禦使非闕譽也

武臣換文

武臣換文資者太宗時白州刺史錢昱換秘書監選工
部侍郎復換觀察使

王冀公為大資政請鑄印不許

真宗復侍郎王冀公景德中罷叅知政事始置資政殿
學士以命之宰相寇萊公頗抑之班翰林之下乃命為
大學士冀公請鑄印不許遂領尚書省自有印也

太尉在三司之下

太尉舊在三司之下由唐以來以上公為重李光弼自
司空為太尉薨贈太保郭子儀自司徒為太尉薨贈太
師李德裕自司徒為太尉皆以超拜李載儀自司徒為太
保王智闕自司徒為太傅二人卒俱贈太尉是以上公

寵待宗臣餘雖有功可遷保傅而韋武之尊不可得也
五代及國初節度皆自檢校太傅遷太尉太尉遷太師
然無升秩明文

不歷郎官為大監

唐姚南仲不歷尚書侍郎而入府使為僕射邇世鄭文
肅列丞相張尚書方平王宣徽拱宸滕侍讀甫呂給事
中惠卿鄧中丞潤父皆不歷郎中員外而便為諫議大
夫

遷郎曹

尚書省二十四司唐世以事簡者兼學士舍人本朝唯
重左曹名曹館職提點刑獄例得名曹而開封府判官
轉運使得名曹右遷左曹學士舍人待詔遷二資帶史館
撰史得優遷如王原叔自工部郎中遷吏部郎中是也
朝官帶史館亦得優遷李邯鄲自博士為禮部員外郎賈
魏公自司封員外郎為禮部郎中是也本朝故事如此

以上春明
退朝錄

宣徽使位樞密使下

宣徽使舊亞樞密使在樞密副使同知樞密院之上咸
平中周營拜宣徽使有所畏避因陳願居其下先帝從
之遂為常例自營始也

出沂國文
正公筆錄

駕親臨問臣僚

邢昺常被疾請告真宗親臨問賜藥一奩銀器千兩練
千疋國朝故事非宗戚將相問疾臨奠帝不親行惟昺
與郭贄以恩舊特用此禮儒者榮之邢上問疾上復臨

喪楊文公
談苑

兩府親戚迴避

國朝舊制父子兄弟及親之在四府者與侍從執政之官必相迴避熙寧初呂公弼為樞密使其弟公著除御史中丞制曰久欲登於近用尚有避於當塗公弼聞之義不能安遂乞罷樞密府久之以觀文學士知并州

二

韓魏公掌誥妻父入叅大政引唐獨孤郁權德輿故事

懇求解職太宗覽奏稱賞除集賢殿修撰趙公罷公復

職

闕

入兩掖親擇牯犀帶賜之今丞相陳公堯叟作相

壻主舉正殊伯相壻楊察忠獻韓公執政壻學淑皆引

公之請為法改以他職

見忠獻公
魏王別錄

具員

具員冊小方冊子可五六寸蓋置懷袖也每官位以黃
紙標格之一親二中三樞密四使相節度使五僕射尚
書六三司使七翰林侍讀侍講密直龍圖閣學士八中

丞丞郎給舍諫議待制九留後觀察防禦使

出蓬山志

軍巡馬步院用文史

先是軍巡及馬步院判官皆用郡府吏建隆元年始詔兩京軍巡州諸馬步院判官令吏部流內銓擇選入無遺省聽減兩選補之始用文史也

定合班儀

建隆三年重定合班儀升六曹侍郎在給事舍人之上郎中補闕之上員外郎在拾遺之上節使在六曹侍郎

之上中書侍郎之上故事北省官為侍從班五品押南省四品六品押南省五品節使在諸司五品之下至是改焉

賜百官冬服

建隆三年十月賜文官常叅官冬服累朝止賜將相翰林學士諸軍大校至是太祖曰冬服不及百官甚無謂也故賜之

一品致仕官綴班

建隆四年詔一品致仕官曾帶同平章事者每遇朝會宜綴中書門下班是時太子太師致仕使益寄來陪祀故不足記

罷代判官

乾德三年詔諸州長吏或有闕籍人代判者即於賓佐中擇公幹者闕不得吏任尤從人先闕承五代以來領節旄為郡守者多武皆不知書所至必自置吏謂之代判政事一以委之用權不法太祖知其弊至是罷之

臺省寺官以三周轉官

乾德四年詔御史臺吏部流內銓南曹刑部大理寺自
少卿郎中員外郎知雜侍御史以下及丞簿司直評事
等並以三周年為滿須常在大司蒞事者至月限滿即
與轉官

常叅官朝官

詔京朝官從今出入及受代歸者宜令中書舍人郭贊
善部知雜事滕中正戶部郎中雷德驤同考校勞績及

銓量材器候有闕中書類能以授之先是常叅官自一品以下皆謂之京官未嘗叅官謂之未曾叅官近代以常官為朝官未嘗叅官為京官故有朝官之目

登聞檢院

雍熙元年改匭院為登聞檢院東延恩匭為崇仁檢南招諫匭為思諫檢西申寃匭為申明檢北通玄匭為招賢檢

選人赴調求官職

淳化五年十一月詔吏部選人赴調並須於京朝內求一人為職官用府縣諸司監印

詔勅藏勅書樓

六月詔天下前後詔勅並藏於勅書樓著以籍受代日交相付仍於印紙歷及南曹歷內批書

羣臣入閣

十二月朔太宗御文德殿羣臣入閣禮畢百官疑下殮唐制州望天子御宣政殿授百官起居諸司奏事仗衛

如式敬宗時於紫宸為入閣之儀五代以來禮容多闕

至是始復舊

以上見國朝事實

事實類苑卷二十八